



Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/11-00535 pillugu pingasunngornermi ulloq 8. juni 2011-mi aalajangiineranik Naalakkersuisunut ilisimatitsineq.

Arctic Umiq Line-p siunissaa

Naalakkersuisut **inassutigaa**,

- Kontomi pingaarnermi 73.01.08 Ilaasunik angallassinermut tapiissutit, 2012-imi ukiunilu tulliuuttuni sisamani amigartooruteqarnissamut qularnaveeqqusiissutissanik imatut aningaasaliisoqarnissaanik siunnersuuteqartoq Arctic Umiq Line A/S nalunaarfigineqassasoq:

Ukioq	2012	2013	2014	2015	2016
Mio. kr.	7,3	10,5	16,3	12,2	13,4

Aningaasaqarnermut Ataatsimiititaliap oqaaseqaatai

Arctic Umiq Linep (AUL-ip) ilaasunik angallassinera 2016 ilanngullugu ingerlaannarnissaanut aningaasanik immikkoortitsinissaq Naalakkersuisut suliami matumani qinnutigaa. Qinnuteqaat aningaasanut inatsimmi kontomut pingaarnermut 73.01.08-mut, Ilaasunik angallassinermut tapiissutinut tunngasumut, oqaasertaliussakkut tunngavissinneqarpoq.

Naalakkersuisut isummernissaannut tunngavissiaq tunngavigalugu qinnuteqaat nassiunneqarpoq, taannalu malillugu ilaasunik angallassinermut tapiissutit taamaatinneqarnissaannik *imaluunniit* ilaasunik angallassinerep ingerlatiinnarneqarnissaanut amigartooruteqarnissamut qularnaveeqqusiissuteqarnissamik Aningaasaqarnermut Ataatsimiititaliamut qinnuteqarnissamik Naalakkersuisut qinnuigineqarsimallutik. Naluneqanngitsut amigartooruteqarnissamut qularnaveeqqusiinissap qinnutiginnissaa Naalakkersuisunit aalajangiunneqarpoq.

Suliami isummernermini Aningaasaqarnermut Ataatsimiititaliaq marlunnut avippoq.

Ataatsimiititaliami amerlanerussuteqartut, Olga P. Berthelsenip, Per Berthelsenip aamma Naaja Nathanielsenip (Juliane Henningsenimut sinniisup), inassuteqaatit **taperserpaat**.

AUL-ip sinerissami ilaasunik angallassineranut taartissamik ullumikkut allamik periarfissaqanngitsoq amerlanerussuteqartut isumaqarput. AUL-ip piffissami allassimasumi ilaasunik angallassinera ingerlaannarnissaanik aalajangiinikkut ilaatigut inoqarfinni Air Greenlandip ullumikkut ilaasunik angallassiffigissallugit neqerooruteqarfigisinnaanngisaani, soorlu Arsummi Kangaamiunilu, periarfissanik qulakkeerinnissaq periarfissiuunneqarpoq. Periarfissanik qulakkeerinninnissamut ukiut tulliuuttu sisamat Naalakkersuisunit atorluarneqartariaqartut amerlanerussuteqartut isumaqarput.

Ingerlatsinnikkut aningaasaqarnermik naatsorsuinerit tunngavigalugit umiarsuarmik sinerissami ilaasunik angallassinerep taamaatinneqarnissaanik Assartuinnermut

Isumalioqatigiissitap inassuteqarnera amerlanerussuteqartunit ilisimaneqarpoq, amerlanerussuteqartulli ataatsimut isigalugu ajornartorsiutissartaqartinngilaat isiginiagassat allat ingerlatsinikkut aningaasaqarnermut tunngasuunngitsut suliamik politikikkut oqimaalutaanermi aamma isiginiarneqarpara. Taamaattoqarsinnaanera Assartuinnermut Isumalioqatigiissitap siumungaaq aamma oqaatigereerpa. Tamatumali peqatigisaanik ilaasunik angallassinermi tapiissutinik pinngitsuuisinnaannginnermik annikillisarnera Naalakkersuisut nalinginnaasumik suliniutigisariaqarpara aammalu amerlanerussuteqartut neriutigaat naatsorsuutigalugulu ukiut tulluuttut sisamat anguniakkap tamatuma anguneqarnissaanut sulissutiginninnermut atorluarneqassasut.

Amigartooruteqarnissamut qularnaveeqqusiissuteqarnissaq Naalakkersuisunit qinnutigineqartoq amerlanerussuteqartut ilisimavaat, taamaattumillu neriutigalugu AUL-ip ilaasunik angallassinermi ukiuni aggersuni aningaasatigut angusassai pitsanngoriarfiujumaartut, taamaalillunilu qularnaveeqqusiissut tamakkiisoq atorneqartariaqarani.

Timmisartumut ilaasunut ingerlaqqissinnaajunnaarnerup akisuusinnaanera amerlanerussuteqartunit aamma tunngavigineqarpoq, tamannali umiarsuarmik ilaasunik sinerissami angallassinermi atuuttut isigineqarani.

Qaqqat innermik anitsisut arsakui timmisartumik angallassinermut ukiuni kingullerni eqquisimanerat amerlanerussuteqartunit aamma maluginiarneqarpoq, tamannalu angallasseriaatsip eqaatsuunissaata pisariaqarneranik ersersitsivoq, tamannalu timmisartumik ilaasunik angallasserinnakkut maanna naammassineqarsinnaanani.

Assartuinnermut Isumalioqatigiissitap isumaliutissiissutaa UKA 11-mi Inatsisartunit oqaluuserineqarnissaa naatsorsuutigineqarmat amerlanerussuteqartut naggasiullugu oqaatigissavaat, tamatumalu kingorna nunatsinni angallannikkut ineriartortitsinnermut aningaasalersuinnermullu ungasissumut isigaluni ataatsimoortumik pilersaaruserinnermut tunngavigineqartussatut isumaliutissiissut naatsorsuutigineqarpoq. Pilersaarut taamaattoq ukiunut arlalinnut anguniagaqarfiusariaqarpoq, taamaattumillu matumani akuersissuteqarneq piffissami aggersumi pilersaaruserinnerminni isumaliutiginninnerminnilu umiarsuarmik sinerissami ilaasunik angallasserinermi ilanngunnissaanut Naalakkersuisut mattunneqartutut isigineqartat.

Ataatsimiitaliami ikinnerussuteqartup, Andreas Uldumip, inassuteqaatit **tapersinnaanngilai.**

Sinerissami ilaasunik angallassineq tamakkiisumik isumagisinnaallugu Air Greenlandip oqaatigimmagu ikinnerussuteqartumit maluginiarneqarpoq.

Umiarsuarmut billetsit akikinnerpaaq aammalu timmisartumut billetsit akikinnerpaaq imminnut nallersuuttut Assartuinnermut Isumalioqatigiissitap naatsorsorsimavaa. Kiisalu ilaasut timmisartornatik umiarsuarmik angalanerisigut ilaasunut akitsuummit isertitassaagaluaani ukiumut 6,5 mio. kr.-it missaat ingerlatseqatigiiffiup annaassagai Mittarfeqarfimmit naatsorsorneqarsimavoq. Nunatsinni timmisartumut billetsit akiinut apparsaatit aningaasat taakku atorneqaraluarpara umiarsuarmut billetsit akiisa taamaaqqataannik, allaalluunniimmi immaq akikinnerusumik, innuttaasut timmisartumut billetsinik qulakkeerneqarsinnaassagaluarput. Tamatumalu peqatigisaanik piffissamik aammalu angalanermi nerisaqarnermut aningaasartuutinik sipaaruteqassagaluarput.

Air Greenlandimi Mittarfeqarfimmilu sulisut akerliannik AUL-ip umiarsuaanni sulisut aningaasarsianit akileraarutinut akiliineq ajorput, taamaalillutillu nunatta karsia kommunillu inuit umiarsuarmut ilaasartaammut ilaanatik timmisartumik angalasuuppata akileraarutitigut isertitassaraluminnik annaasaqassallutik. Akileraarutitigut isertitat taakku isertitakinnerpaat timmisartumik angalasinnaanermut akissaqarnissaat qulakkeerniarlugu timmisartumut billetsinut tapiissuteqarnissamut aamma atorneqarsinnaasimagaluarput.

Nunatta karsiata ingerlataanik aningaasaqarnikkut patajaallisaanerup anguniarneqarnissaa Naalakkersuisut minnerunngitsumik ukiuni makkunani suliniutigisariaqarpaat. Taamaalilunilu AUL-ip ingerlatai amigartoorfusut ungasinnerusq isigalugu attatiinnarniarneqarsinnaanngillat. Ukiut arlaqanngitsut qaangiuppata AUL-ip umiarsuaatai nutaanngilissapput, taamaattumillu ingerlatsinnermut aningaasartuutit amerliartuinnarnerat takornarianullu atugassarititaasut pilerinannginnerulernerat pissutigalugu umiarsuaatileqatigiit angusaasa ajorsartuinnarnissaat maannangaaq ilimagereerneqarsinnaavoq. Amigartooruteqarnissamut qularnaveeqqutitut qinnuteqaatigineqartoq naammangitsoq paasinarseratarsinnaavoq qinnuteqaallu una akuersissutigineqareerpat tapiiffigineqaqqinnissamik qinnuteqaataajunnartut itigartikkuminaatsupilussuusinnaapput.

Tamatuma saniatigut ikinnerussuteqartup tikkuarpaa AUL-ip suliassanik ullumikkut naammassinnittarnera naammaginangimmat, taamaattumillu tapiissuteqaqqinnissamut taarsiullugu nunatsinni timmisartumik angallassinermut pitsanngorsaataasinnaasunik nassaarniarqartariaqarpoq. Assersuutigalugu Qeqertarsuup angallannikkut kiffartuussivigineqarnera ajorluinnarpoq. Tamanna ataasiinnarmik aallaaveqartumik angallasseriaatsip periarfissiissutaasa piviusunngortinnerisigut pitsanngortinneqarsinnaavoq.

Kiisalu AUL-ip pisorta qarfiata allakkiaani inerniliussat erseqqissaatiginissaa ikinnerussuteqartup kissaatigaa. Tassani allassimavoq pisortanit tapiiffigineqarani ingerlatseqatigiiffiup ingerlatsinerata ingerlatiinnarneqarnissaanut aktiaatillit aningaasaleerusussinnaanissaannut niuernikkut maanna tunngavigisaaq annikippallaartoq. Allatut oqaatigalugu ingerlatseqatigiiffimmik piginnittut AUL-ip aningaasaqarnerata pitsanngoriarnissaa upperinngilaat. Tapiissutit taakku taamaativinneqarnissaat aningaasallu Assartuinnermut Isumalioqatigiissitap kaammattuutai naapertorlugit anguniagaqarfiusumik siumullu isigisumik atorineqarnissaat pitsaanerusoq tassuunakkut ersersinneqarpoq.

Amerlanerussuteqartut kissaataat naapertorlugu aalajangiisoqarpoq.

Naggasiullugu oqaatigineqassaaq suliap ataatsimiititaliamit suliarineqarnerani Finn Karlsen peqataanngimmat.

Aningaasaqarnermut Ataatsimiititaliap aalajangiinera

Siuliani allassimasutut paasinnilluni Naalakkersuisut inassuteqaataat Aningaasaqarnermut Ataatsimiititaliami amerlanerussuteqartunit **akuersissutigineqarput**. Aningaasaqarnermut Ataatsimiititaliami ikinnerussuteqartup inassuteqaatit akuersissutigisinnaanngilai.

Aningaasaqarnermut Ataatsimiititaliaq sinnerlugu

Olga P. Berthelsen
Aningaasaqarnermut Ataatsimiititaliap siulittaasua